



Inatsisartut aalajangiiffigisassaattut siunnersuut Naalakkersuisut peqquneqassasut nalunaarusioqqullugit suleriaatsit eqaallisarumallugit, peqqinnissaqarfimmi imminut sullinnerup eqqunneqarnerata aningaasaqarnikkut allaffissornikkullu kingunerisassaasa kiisalu inuiaqatigiinnut iluaqutissartaasa ersarissarnissaat siunertaralugu, taamaalillunilu sulisut napparsimasunut innuttaasunullu toqqaannartumik attaveqarnermut atorineqarsinnaaqullugit. Nassuiaat UPA 2023 nallertinnagu Inatsisartunut agguanneqassaaq.

(Inatsisartunut ilaasortaq Anna Wangenheim, Demokraatit)

(Siullermeerneqarnera)

Demokraatit Inatsisartunut ilaasortaataannut siunnersuummut pitsaasumut qujanaq.

Aallaqaasiutitut pakatsinera takutillara, Naalakkersuisut siunnersuutip itigartinnissaannik innersuussimmata. Ajoraluartumillu takussutissariinnarpaa takorluugaqannginneq aammalu Peqqinnissaqarfimmi piorsaarusunnginneq. Tamanna innuttaasunut pitsaasuunngilaq.

Tassa uaniilersimanerpugut, Naalakkersuisut qasoreersimasut, pisariaqalersimasorlu nukinnik nutaanik isiginnittaatsinillu nutaanik pisariaqartitsisoqalersoq?

Peqqinnissaqarfik inuulluataarnitsinni aningaasartuutaavoq annertoorujussuaq. Taannalu aningaasartuut qaffakkaluttuinnarluni, sivisunermik inuulersimagatta passunneqarnissamillu pisariaqartitsigaluttuinnarluta. Paatsoorniaqinasinga, qujanarpoq sivisunermik inuusinnaanngorsimagatta inuunitsinni asasagut sivisunermik najorsinnaalerlugit. Taassumali kinguneraa, allatut eqqarsarnissarput pisariaqalersoq ukkatariuartariaqarippullu, peqqinnissaqarfippu qanoq pitsanngorsassanerlugu piorsassallugulu, aningaasartuutit qaffatsikkaluttuinnarnagit.

Demokraatit pingaartippat, Peqqinnissaqarfitta piorsartuarnissaat isumassarsiasanik inernerususanillu nassaarniarnissaq, peqqissuunissap anguneqarnissaanut aningaasaateqarnissarput qulakkeerniarlugu. Uagutsinnut pingaartuuvoq, assaat kissalaartut ukkatariuarnissaat qanorlu qulakkeersinnaanerippu, aningaasat amerlanerpaat toqqaannartumik paaqqineqarnermut isumassuinemullu tuttussanngorlugit. Uagut aningaasat amerlanerusut peqqissaasunik atorfinitsitsinermut atorunneruagut Peqqissutsimut Pisortaqarfimmi immikkoortortani pisortanik amerlanernik atorfinitsitsininngarnik.

Una siunnersuut Inatsisartunut ilaasortap Anna Wangenheim-imeersoq digitalimik ineriartornerup atorluarnissaanut tunngassuteqarpoq suliat ingerlanneqarnerinut pisariillisaanissaq anguniarlugu imminut sullinnerit digitaliusut pilersinniarlugit. Ima paasillugu, aningaasat amerlanerusut paaqqinninnermut isumassuinemullu atorlugit Peqqinnissaqarfimmi aningaasartuutit tamarmiusut qaffanngikkaluarlugit. Demokraatit isaannik isumassarsiaq pitsassuuvoq, taannalu isumassarsiaq piaarnerpaamik aallartittariaqarparput.



Ajoraluartumik Naalakkersuisut allatut paasinnittaaseqarput. Naalakkersuisut utaqeqqaarniarpaat, qanoq pisoqassanersoq.

Oqareernittut paasisassaalluni Naalakkersuisut tungaanniit takorluuisinnaassuseqanngilaq.

Neriuppunga, Inatsisartuni amerlanerussuteqartut Anna Wangenheim tusarnaassagaat Naalakkersuisuunngitsut. Tassami tamanna Nunatsinnut Peqqinnissaqarfitsinnullu pitsaanerpaassammat.

Siunnersuutip akuerineqarnissaa aammalu Ilaqutariinnermut- Peqqissutsimullu ataatsimiititaliami suliareqqitassanngorlugu ingerlateqqinneqarnissaa innersuussutigineqarpoq.